

starogradski

OPĆINA STARI GRAD
SARAJEVO



MUNICIPALITY OF STARI
GRAD SARAJEVO

haber

BESPLATAN PRIMJERAK • DECEMBAR, 2014. broj 24.



PASIVNA KUĆA NA KOVAČIMA

- 2-3 Otvaranje pasivne kuće
- 4 Predstavljena prva kerano-heklana državna zastava u BiH
- 5 - 6 Godišnja press konferencija Općine
- 8 - 9 Općinsko vijeće
- 12-14 Četiri razvojna projekta za 2015. godinu
- 16-17 Sportska igrališta: Iza gaja i Mjedenica
- 20 BH Telecom fudbalska liga osnovnih škola
- 22 Staro Sarajevo: Sarajevska porodica Despić



Skenirajte webcode mobilnim telefonom



Impressum

Izdavač: Općina Stari Grad Sarajevo
Tiraž: 2.000
Pripremili: Almedina Porča Alma Imamović
DTP: Safet Mališević
Fotografije: Safet Mališević
Štampa: "Pentagram" d.o.o.
Adresa: Zelenih beretki br. 4 71000 Sarajevo
web: www.starigrad.ba
e-mail: info@starigrad.ba
Tel./fax: +387 33 282 385
+387 33 217 916

Projekti

U Starom Gradu sagrađen prvi pasivni objekat u BiH



Kuća je sagrađena na Kovačima, u ulici Nadmlini 28

Kuća budućnosti štedi energiju i godišnje troši svega 15Kw/m² ● Ugrađen certificirani sistem grijanja za pasivne kuće ● Služit će kao ogledni primjer za sve koji žele ovako graditi

Prvi pasivni objekat u BiH, izgrađen kao rezultat saradnje Općine Stari Grad i tvornice montažnih kuća drvne industrije "Promo", svečano je predstavljen sredinom decembra u Starom Gradu. Pasivna kuća je objekat sa godišnjom potrošnjom energije od 15Kw/m², a troši do 20 puta manje od prosječne kuće u BiH. Procjene su da su troškovi ove kuće za grijanje, hlađenje, ventilaciju i sanitarnu vodu, na godišnjem nivou oko 300 KM.

Kuća je opremljena najsavremenijim namještajem, a ima ugrađen specijalni, certificirani sistem grijanja za pasivne kuće. Kuća ima ugrađenu poseban sistem grijanja, odnosno hlađenja, koji funkcioniše na principu zraka koji se usis-

nim ventilom usisava u cijevi položene u zemlji, na dubini od 2 metra, ispod kuće, zatim oko kuće i na tavanu. Zrak se po potrebi zagrijava ili hladi i obezbjeđuje ugodnu temperaturu unutar objekta. Prema nezvaničnim procjenama, cijena ovog sistema iznosi od 25-30.000 KM, a može zagrijavati, odnosno hladiti i do 300 m² površine.

Pasivne kuće su budućnost i perspektiva

Tvornica montažnih kuća drvne industrije "Promo" iz Donjeg Vakufa već je gradila niskoenergetske objekte u zemljama zapadne Evrope, ali ovo je prvi takav objekat u BiH i smješten je u jednoj od najstarijih sarajevskih mahala, na

Pasivne kuće se grade u Evropi od 1990.godine

Prvi pasivni objekat sagrađen je u Darmstadtu, u Njemačkoj 1990/91. god. Uslijedili su objekti u Austriji, Švicarskoj, Velikoj Britaniji, Francuskoj, skandinavskim zemljama, a zatim i u SAD-u i Aziji. Do 2010. godine sagrađeno je oko 25.000 pasivnih kuća širom Evrope. Većina pasivnih zgrada su izgrađene u državama njemačkog govornog područja i Skandinaviji.



Brojnim zvanicama obratili su se Ibrahim Hadžibajrić i Kemal Čolak

Kovačima.

“Ima simbolike u tome što smo ovu kuću sagradili baš u općini Stari Grad gdje su prepoznali budućnost i perspektivu ovakve gradnje. Načelnik Hadžibajrić je spremno prihvatio ideju koju su prije svega iznjedrili naši mladi inženjeri arhitekture i građevine i zajedno s uposlenicima Općine došli smo do otvaranja prve pasivne kuće u BiH,” kazao je Kemal Čolak generalni direktor firme “Promo”. Čolak je dodao da je u projektu učestvovalo još 18 njihovih kooperanata, od kojih je većina firmi iz BiH, ali tu su i neke kompanije iz Hrvatske, Slovenije, Austrije i Njemačke.

Kako je kazao načelnik Ibrahim

Hadžibajrić, kuća je u vlasništvu Općine i ona će služiti kao ogledni primjer u narednih 10 godina. Veličina kuće je 103 metra kvadratna.

“Mi smo ustupili zemljište i izdali potrebne dozvole, urbanističku i građevinsku, a firma 'Promo' je u potpunosti finansirala gradnju. Potpisali smo ugovor prema kojem ćemo je u narednih deset godina zajednički koristiti kao urnek za sve one koji žele da grade baš ovakvu kuću”, istakao je Hadžibajrić izrazivši zadovoljstvo zbog saradnje sa firmom “Promo”.

Kako je procijenjeno, vrijednost kuće je oko 150.000 KM, odnosno 1.500 KM po m², ne računajući cijenu zemljišta na kojem je sagrađena.



Specijalni sistem grijanja



Dnevni boravak moderno opremljen

Smanjuju negativni uticaj na okolinu

Naziv pasivna kuća (njemački Passivhaus) znači rigorozan, dobrovoljan. Passivhaus je standard energetske efikasnosti u stambenim i sličnim objektima, koji smanjuje njihov (negativni) uticaj na okolinu. Taj standard rezultira potrebom za malom količinom energije prilikom grijanja ili hlađenja.



Najsavremenija kupaoička oprema

Prezentacija

Općina Stari Grad predstavila prvu kerano-heklanu državnu zastavu BiH

Udruženje "Gračaničko keranje" i Općina Stari Grad ostvarili uspješnu saradnju • Državnu zastavu radile majka i kćerka više od tri mjeseca • Uskoro i kerano-heklana zastava sa grbom Općine Stari Grad

Prva kerano-heklana državna zastava Bosne i Hercegovine, autentični ručni rad članica udruženja "Gračaničko keranje", predstavljena je 18. novembra u prostorijama Općine Stari Grad. Pored državne zastave, ove vrijedne žene uradile su i male zastave sa grbom Općine Stari Grad, a počele su izradu i velike općinske zastave.

U želji da podrži rad vrijednih žena, članica Udruženja "Gračaničko keranje", kojima je to jedini izvor prihoda, Općina Stari Grad i načelnik Ibrahim Hadžibajrić predložili su saradnju kroz realizaciju ove



Načelnik Hadžibajrić sa članicama Udruženja "Gračaničko keranje"

Male zastave sa općinskim grbom

Nermina Hadžić je kerala male zastave sa grbom Općine Stari Grad i kaže da je znala često pogriješiti i početi iznova, ali nikad nije odustala. "Ovo je moje prvo keranje i predsjednica udruženja me je znala 'vratiti' po sto puta na početak, sve dok nisam uradila kako treba, ali sada sam sretna zbog toga jer je sve ovako dobro ispalo," kaže Nermina. Za početak ona je izradila 15 malih zastava, a planirana je izrada još toliko koje će se koristiti u promotivne svrhe.



jedinstvene ideje.

"Upoznali smo se kada su članice Udruženja došle kod mene i tražile da svoj proizvod predstave na trgu ispred Katedrale. Mi smo im tada dali odobrenje i ujedno se dogovorili da naprave dvije zastave države BiH i Općine Stari Grad, te još 30-ak malih zastava. Ovo je jedan tradicionalni zanat koji je u BiH počeo da izumire, a ova djelatnost u BiH je bila zaboravljena. Podržali smo ove žene da ne bi došli u situaciju da naši autohtoni

proizvodi prelaze iz jedne države u drugu, pogotovo u države u okruženju," kazao je načelnik Ibrahim Hadžibajrić.

"Zahvaljujem se vrijednim ženama koje su dale sve od sebe da urade ovu zastavu," dodao je Hadžibajrić.

Po prvi put urađena je jedna kerano-heklana zastava

Sve članice Udruženja "Gračaničko keranje", predvođene predsjednicom Azeminom Ahmetbegović, prilikom predstavljanja zastave nosile su prepoznatljiviji Cvijet "Sjećanje" na reveru, koje je dizajniralo upravo njihovo Udruženje. "Ovaj Cvijet koji vidite postao je prepoznatljiv u cijelom svijetu. Mi njegujemo tradiciju i kulturu naših prostora i pokušavamo na neki način nametnuti društvu da prepoznaju naš trud i volju da napravimo

ljepši ambijent za sve nas," kazala je Ahmetbegović. Govoreći o zastavi izrazila je zadovoljstvo zbog ovog velikog projekta i zahvalnost Općini Stari Grad što je omogućila ženama da se predstave na ovaj način.

"Ovo je prvi put da je urađena jedna kerano-heklana zastava, naša bosanskohercegovačka zastava, nešto što volimo, i što predstavlja našu državu. Uspjeli smo je završiti prije Dana državnosti da je svi vi vidite. Nije bilo lahko i neki nisu ni vjerovali da ćemo uspjeti, ali s obzirom da smo imali veliku želju da uradimo zastavu, kao i podršku načelnika Hadžibajrića koji je prepoznao našu djelatnost, uspjeli smo," rekla je Ahmetbegović.

Prva kerano-heklana državna zastava Bosne i Hercegovine je izložena u Info-press centru Općine Stari Grad, na Bašćaršiji (ulica Halači br.1).

Izrada državne zastave trajala je više od tri mjeseca

Izrada državne zastave trajala je više od tri mjeseca, a uradile su je majka i kćerka Fatima Mahmutović i Aida Mulahuseinović, koje su nerijetko noćima radile kako bi na vrijeme završile posao. "Radile smo zajedno i naizmjenično. Kad bi se mama umorila, ja bih nastavila, tako da smo radile po 8-10 sati dnevno. Često smo radile tokom noći, jer smo tokom dana obavljale kućne poslove," kazala je Aida Mulahuseinović. Njena majka Fatima Mahmutović otkrila je kako je ovaj posao za njih bio veliki izazov jer je u pitanju zastava države Bosne i Hercegovine. "Ostale žene u udruženju su sada pomalo ljubomorne na nas jer bi i one htjele uraditi zastavu, a nama je ovo velika čast," kazala je Fatima.

Na proljeće otvaranje arheološkog lokaliteta At mejdan

Radovi na konzervaciji i restauraciji dijela arheološkog lokaliteta "At mejdan" u završnoj su fazi. Zbog osjetljivosti materijala kojima će se izvoditi finalni radovi, projekat će biti završen u proljetnim mjesecima, a ne u decembru, 2014. godine, kako je planirano. Prema riječima nadležnih iz Zavoda za zaštitu kulturno-historijskog i prirodnog naslijeđa Kantona Sarajevo, preostali su još

tzv. 'fini' radovi za koje je potrebno sačekati pogodnije vremenske uslove.


Iznad kompletnog harema sa grobnim mjestima bit će postavljen most dužine 10-ak metara, što će omogućiti bolju preglednost lokaliteta. Most će se pružati iz pravca ulice Hamdije Kreševljakovića prema ulazu u harem džamije i imat će posebnu iluminaciju (rasvjetu) kako bi se omogućila i noćna

prezentacija arheološkog parka. Most je rađen u kombinaciji metala i drveta, drveni podovi, metalna (pocinčana) ograda.

Otkriven neobičan nišan

Prilikom iskopavanja mezaristana Bakr-babine džamije na ovom lokalitetu, pronađen je i jedan nišan za koji struka smatra da je dosad neviđen u Sarajevu, a možda i šire. Nišan je pravljen iz dva dijela, ima kapu udubljenu poput krune četvrtastog oblika, a ne predstavlja ni šešir ni 'francusku' kapu, već simbolizira nešto treće, što tek treba otkriti. Pretpostavlja se da je riječ o muškom rahmetliji koji je po nečemu bio izuzetan, što mu je dalo poseban status i trag. Formiran je tim stručnjaka koji će istraživati njegovo značenje.

Ukupna vrijednost radova konzervacije i restauracije ovog lokaliteta je oko 174.000 KM, od čega je cca 134.000 KM (70.000 eura) donirao prijateljski grad Bursa iz Republike Turske, 15.000 KM je obezbijedio Zavod, a ostatak finansira Općina Stari Grad. Izvođač radova je firma "Neimari" d.o.o.



Konzervacija i restauracija košta oko 174.000 KM



Bit će istraženo značenje nišana s kapom

U Logavinoj otvoren Centar za fizikalnu medicinu

U Mjesnoj zajednici Logavina svečano je otvoren Centar za fizikalnu terapiju i rehabilitaciju Stari Grad. Prostor je adaptiran i opremljen zahvaljujući saradnji Općine Stari Grad Sarajevo i JU Dom zdravlja KS, a sve u interesu kvalitetne zdravstvene zaštite koju će imati građani ove općine.

Kako je kazala prim.dr. Jasminka Bašić, šef Službe centra za fizikalnu medicinu i rehabilitaciju u Starom Gradu zadovoljni su novim prostorijama.

"Centar ispunjava potrebne uslove i, što je najvažnije, ima prilaz i prirodnu svjetlost koju nismo imali u starom prostoru. Pacijenti su već obaviješteni, znaju za novu lokaciju, a očekujemo i novi priliv pacijenata", pojašnjava Bašić, te dodaje kako je ipak preventiva najvažnija i da je ovo rehabilitacija u zajednici.

U sklopu Doma zdravlja Stari Grad već je postojao jedan ovakav Centar i nalazio se u blizini Ambasade Kuvajta,



Novi centar za fizikalnu terapiju i rehabilitaciju Stari Grad

preko puta Vijećnice. S obzirom da nije bio adekvatan za ove namjene i da nije imao pravi prilaz, a i zbog velikih gužvi, ukazala se potreba za još jednim Centrom za fizikalnu terapiju i rehabilitaciju. Stavljanjem u funkciju ovog centra u Domu

kulture Logavina uveliko će se smanjiti gužve, a građanima će se pružiti adekvatnija i puno bolja usluga. Radovi na preuređivanju prostorija podrazumijevali su izgradnju novog ulaza, prilagođavanje prostorija, te kompletno uređenje.

Prezentacija



Općina uspješno završila 2014. godinu

Ulagano u razvoj infrastrukture, gradnju novih objekata, zaštitu nacionalnih spomenika • Veliki planovi za 2015. godinu

Općina Stari Grad Sarajevo nastavila je i u 2014. godini ulagati u razvoj infrastrukture, gradnju novih objekata, sanacije i rekonstrukcije saobraćajnica, vodovodnih i kanalizacionih mreža, potpornih zidova, te zaštitu kulturno-historijskih objekata. Putem nadležnih službi, pružala se podrška građanima za podsticaj razvoja poljoprivrede, stočarstva i drugih djelatnosti, zatim pripadnicima i članovima porodica boračke populacije, kao i socijalno ugroženim kategorijama. Sve ovo, ali i brojni drugi projekti predstavljeni su na godišnjoj press konferenciji u Općini Stari Grad.

O projektima, ulaganjima i planovima za narednu godinu, prisutnima je govorio načelnik Ibrahim Hadžibajrić. Odgovarajući na pitanje koji su to najveći projekti realizovani u ovoj godini, Hadžibajrić ih je istakao nekoliko.

“Izdvojio bih konzervaciju i restauraciju nacionalnog spomenika Saburina kuća, te arheološkog lokaliteta At mejdan. Izgradili smo sportsko igralište Iza gaja, uredili korito rijeke Moščanice, te realizovali brojne infrastrukturne projekte koji su od životnog

značaja za ovu Općinu koja ima veoma lošu infrastrukturu. Također, sve je spremno za rekonstrukciju ulice Strošići, što je projekat vrijedan oko 600.000 KM, a Kanton nam je za te svrhe već obezbijedio 290.000 KM. Ostatak finansira Općina.” pojasnio je Hadžibajrić.

Pola miliona ovjerenih dokumenata

O podršci koju je Općina pružila građanima tokom ove godine svjedoči i broj stranki koje su prošle kroz šalter-salu, gdje je u 2014. ovjereno skoro pola miliona dokumenata (495.648), legalizirano 47.749 potpisa i izdato 29.355 izvoda iz matičnih knjiga. Sekretari šesnaest mjesnih zajednica primili su u ovoj godini 18.190 stranaka.

Ante2 (sa fotografijom): Riješen dugogodišnji problem

Saniran je ravni prohodni krov atomskog skloništa/zaklona objekta Općine Stari Grad, površine 1.300 m², što je bio dugogodišnji problem ove ustanove jer je zbog dotrajalosti dolazilo do prokišnjavanja i plavljenja prostora ispod krova/zaklona. Sanacija je koštala oko 97.500 KM.

Općina je ulagala i u obrazovno-odgojne institucije, a u cilju rješavanja nedostatka sportskih terena, u ovoj godini su izgrađena dva igrališta. Također, rješavali su se i problemi interno raseljenih nastavkom gradnje stambenog objekta na Baruthani, a u 2014. Općina je realizovala i pionirski poduhvat gradnje prve pasivne kuće u našoj zemlji, promovirajući tako korištenje energije iz obnovljivih izvora.

Sanirane i asfaltirane brojne ulice

U toku 2014. godine sanirane su ulice i kolovozna oštećenja na 19 lokacija, za što je Općina Stari Grad iz budžeta obezbijedila oko 370.000 KM. Sanirane su ulice: Nadlipe čikma, Prvi bataljon, Baruthana, Dolovi, Sedrenik od broja 290 do 306, Kračule, Sedrenik čikma, Garaplina, krov atomskog skloništa ispred zgrade Općine, Iza gaja, put prema Hreši, proširenje donjeg dijela ulice Kovači, dio ulice Bostarići, Ramića banja, Josipa Štadlera, pristupni put na Lapišnici i Bakije sokak, Hladivode i Hadžijska ravan. Djelimična sanacija kolovoznih oštećenja i krpljenje udarnih rupa tokom 2014. godine koštali su oko 54.000 KM, a izvedeni su na 15-ak lokacija.

**Sanirana ulica Dolovi**

Potporni zidovi su dugogodišnji neriješeni problem Općine Stari Grad koji se sistemski rješava u skladu sa budžetskim sredstvima. S obzirom da je Stari Grad smješten uglavnom u padinskim dijelovima, brojne su lokacije na kojima je potrebno izgraditi potporne zidove u cilju osiguranja boljih i sigurnijih uslova života građana. Ove godine izgrađeno ih je šest: Baruthana kod broja 69, Save Skarića 9, u koritu Miljacke (kod Inat kuće), Ramića banja 40, Žagrići i Pstrma.

Riješeni dugogodišnji problemi sa vodovodom i kanalizacijom

Izdvajanjima od preko 100.000 KM u ovoj godini, Općina je riješila dugogodišnje probleme građana sa nedostatkom, ili neadekvatnim vodovodnim i kanalizacionim priključcima.

Na izuzetno zahtjevnom terenu, u Mjesnoj zajednici Mošćanica, postavljena je nova kanalizaciona mreža, čime su stvoreni uslovi za priključenje 40 domaćinstava na novu mrežu, a spriječeno je onečišćavanje rijeke Mošćanice. Prva faza radova urađena je 2013. godine, a druga fazarealizovana je ove godine, za što je Općina izdvojila 41.500 KM. Osim toga, ove godine je 13 domaćinstava u ulici Paje dobilo nove vodovodne i kanalizacione priključke. Na kompletnoj trasi je prvo raščišćen teren i prekopane postojeće asfaltna i tamponske površine i putevi. Uklonjene su stare i dotrajale cijevi i postavljene nove, u dužini od 80 metara, a potom su urađeni priključci. Ukupna vrijednost projekta je oko 66.000 KM. Stanovnicima ulice Nova Baruthana, Općina je donirala materijal (cijevi) za izgradnju kanalizacione mreže, u vrijednosti od oko 16.600 KM.

Sadnja lipa u Aleji ambasadora

Aleja ambasadora u ovoj godini bogatija je za 11 lipa. U 2014. godini, lipa su posadili: šef Delegacije Evropske unije u BiH/specijalni predstavnik EU Peter Sorensen, švedski ambasador Stefan Fredrik Schiller, hol-

**Kanalizacija na Novoj Baruthani****Kanalizacija na Mošćanici**

andski ambasador Jurriaan Kraak, pakistanski ambasadori Muhammad Yousaf i Syed Khalid Amir Jaffery, ambasador Republike Srbije Stanimir Vukičević, finski ambasador Pekka Metso, turski ambasadori Ahmet Yildiz i Cihad Erginay, njemački ambasador Christian Hellbach i austrijski ambasador Martin Pammer. Aleja ambasadora trenutno broji 136 lipa.

Rad i aktivnosti Općine Stari Grad Sarajevo bili su tokom cijele godine medijski praćeni od strane partnerskih i drugih medijskih kuća, kao i putem općinske web stranice i biltena "Starogradski haberi". Internet stranica Općine Stari Grad (www.starigrad.ba) u toku 2014. godine zabilježila je oko 154.000. posjeta.

Općina će u narednoj godini postati "veliko gradilište"

Načelnik Hadžibajrić je, sumirajući rezultate na kraju godine, izrazio zahvalnost svim službama koje su radile na realizaciji brojnih zadataka i projekata u ovoj godini, posebno istakavši angažman uposle-

**Specijalni predstavnik EU Peter Sorensen**

Riješen dugogodišnji problem

Saniran je ravni prohodni krov atomskog skloništa/zaklona objekta Općine Stari Grad, površine 1.300 m², što je bio dugogodišnji problem ove ustanove jer je zbog dotrajlosti dolazilo do prokišnjanja i plavljenja prostora ispod krova/zaklona. Sanacija je koštala oko 97.500 KM.



nika Službe za opću upravu koji su, prema njegovim riječima, bili izuzetno opterećeni u vrijeme kada šalter-sala Općine Centar nije bila u funkciji, pa je većina građana dolazila u Općinu Stari Grad.

Govoreći o planovima za 2015. godinu, Hadžibajrić je najavio mogućnost realizacije šest razvojnih projekata u drugoj polovini naredne godine, čime bi Općina Stari Grad Sarajevo postala najveće gradilište u Kantonu Sarajevo, a možda i šire. Ukoliko budu odobrena kreditna sredstva Saudijskog fonda za razvoj, kao što je već ranije najavljivano, počela bi realizacija četiri projekta.

"Radi se o projektima izgradnje parking garaže preko puta Vijećnice, sportske dvorane uz OŠ 'Edhem Mulabdić', nadogradnji objekta Doma zdravlja Stari Grad i 'utopljanju' zgrade Općine Stari Grad," kazao je Hadžibajrić i dodao: "Osim toga, pokušat ćemo u narednoj godini realizovati najavljenju rekonstrukciju Bašćaršijskog trga, te projekat Halvadžiluk u okviru kojeg bi na Bašćaršiji izgradili poslovne prostore."

**Bašćaršijski trg: Moguća rekonstrukcija u 2015.**

Općinsko vijeće

22. sjednica

Općinskog vijeća

Nacrt budžeta Općine Stari Grad Sarajevo za 2015. godinu, u iznosu od 15.980.000,00 KM, usvojen je na 22. sjednici Općinskog vijeća Stari Grad, uz zaključak da se uputi u javnu raspravu koja će trajati 30 dana. Također, u javnu raspravu, koja će trajati 15 dana, upućen je i Nacrt Odluke o jedinstvenim kriterijima za raspodjelu sredstava obezbijedenih u Budžetu Općine Stari Grad za finansiranje rada boračkih udruženja.



Sa 22. sjednice Općinskog vijeća

Vijećnici Općinskog vijeća Stari Grad na oktobarskoj sjednici primili su k znanju informaciju o realizaciji Budžeta Općine Stari Grad za period 01. januar/20. septembar, 2014. godine, dok je Prijedlog Odluke o izmjenama i dopunama – Rebalansu Budžeta Općine Stari Grad Sarajevo za 2014. godinu vraćen predlagraču na dopunu. Ovo je ujedno i tačka o kojoj su vijećnici najviše raspravljali, te su na kraju doneseni zaključci da je rok za dostavu dopunjenog Prijedloga Odluke na ponovno razmatranje do naredne sjednice Općinskog vijeća, a za dopunjeni Prijedlog Odluke se moraju uzeti u obzir sve sugestije i primjedbe koje su vijećnici iznijeli na sjednici. Također, zaključeno je da predlagrač treba obaviti široke konsultacije sa Kolegijem Općinskog vijeća oko ove tačke.

23. sjednica

Općinskog vijeća

Nakon povlačenja prijedloga odluka o Rebalansu budžeta Općine Stari Grad Sarajevo za 2014. godinu, dodjeli i prodaji stanova kojima raspolaže Općina Stari Grad Sarajevo, te o utvrđivanju uslova i postupka za ostvarivanje prava učešća građana u dodjeli plastenika i dodavanja novih tačaka na dnevni red, održana je 23. sjednica Općinskog vijeća Stari Grad. Kolegij Općinskog vijeća donio je zaključak da neće razmatrati prijedlog Odluke o Rebalansu budžeta za 2014. godinu jer nisu ispoštovani zaključci Vijeća sa prethodne sjednice.

Uvrštene su, a ujedno i usvojene (nakon zasjedanja Mandatno-imunitetske komisije), tačke: Prijedlog odluke o prestanku mandata izabranog vijećnika u Općinskom vijeću Stari Grad (Nermin Bjelak-BPS), Prijedlog odluke o verifikaciji mandata vijećnika u OV (Alem Ćesir-BPS) i Prijedlog rješenja o razrješenju Zamjenika predsjedavajućeg OV (Nermin Bjelak-BPS).

Godišnji izvještaj o aktivnostima Načelnika Općine za 2012. i 2013. godinu vijećnici nisu prihvatili, dok je Prijedlog za neposrednu dodjelu - prenos prava zakupa poslovnog prostora u ulici Gazi Husrev-begova broj 27 vraćen na doradu.



Alem Ćesir (BPS)

24. sjednica

Općinskog vijeća

Prijedlog budžeta Općine Stari Grad za 2015. godinu, u iznosu od 17.463.000 KM, usvojen je na 24. sjednici Općinskog vijeća, nakon što je predlagrač usvojio određene amandmane Klubova stranaka SDA, SDP, Naše stranke i samostalnog vijećnika Nihada Čolpe. Usvajanju budžeta prethodilo je usvajanje zaključka prema kojem će Općinsko vijeće na narednoj sjednici pristupiti izglasavanju izmjena Odluke o prodaji poslovnih prostora što će onda otvoriti mogućnost da se usvoji Odluka o utrošku sredstava iz namjenskih sredstava za realizaciju dva projekta. Na taj način bit će moguće obezbijediti sredstva za rekonstrukciju Baščaršijskog trga i izgradnju novih dućana na Baščaršiji kroz projekat "Halvadžiluk".

Program rada načelnika Općine za 2015. godinu vijećnici su jednoglasno prihvatili, nakon što je predlagrač dao pojašnjenja



Prihvaćeni amandmani kluba SDP-a

u vezi realizacije četiri razvojna projekta kreditnim sredstvima Saudijskog fonda za razvoj. Utvrđen je i Nacrt programa rada Općinskog vijeća, koji će biti upućen u 15-dnevnu javnu raspravu, u kojoj će učestvovati Općinsko vijeće i njegova radna tijela, političke stranke, odnosno klubovi vijećnika, Načelnik Općine, Pravobranilaštvo, službe, građani i savjeti mjesnih zajednica.

Usvojeni su i prijedlozi odluka: o dodjeli i prodaji stanova na kojima Općina Stari Grad ima pravo raspolaganja, o jedinstvenim kriterijima za raspodjelu sredstava obezbijedenih u Budžetu Općine Stari Grad Sarajevo za finansiranje rada boračkih udruženja, te o pristupanju izradi Strategije održivog razvoja turizma u Općini Stari Grad Sarajevo za period 2015/2019. godina.

Usvojen je i upućen u javnu raspravu i Nacrt odluke o građevinskom zemljištu Općine Stari Grad Sarajevo.

Povećan broj napuštenih životinja ugrožava sigurnost građana

Zavodu za javno zdravstvo Kantona Sarajevo- Amblanti za zaštitu od bjesnila, u prvih devet mjeseci 2014. godine za pomoć se, nakon ugriza pasa, obratilo 30 muških i 18 ženskih osoba. Najmlađi pacijent je imao samo tri godine, a najstariji 65 godina. Ove podatke iznijela je prof.dr. Zarema Obradović na održanoj tematskoj sjednici Općinskog vijeća Stari Grad, održanoj 17. novembra, na temu "Stanje sigurnosti građana u odnosu na povećan broj napuštenih životinja na ulicama".

Tematskoj sjednici prisustvovao je i ministar prostornog uređenja i zaštite okoliša KS Zlatko Petrović koji je ponovio da problem napuštenih životinja na ulicama treba rješavati na nivou KS, a uz punu podršku lokalnih zajednica i svih drugih subjekata uključenih u ovu problematiku.

Općinsko vijeće Stari Grad također je izrazilo zabrinutost za sigurnost građana Općine zbog povećanog broja napuštenih životinja na ulicama. Doneseni su zaključci da se od nadležnih inspekcijских službi (općinskih, kantonalnih i federalnih) zatraži cjelovita informacija

o stanju azila u Faletićima i Prači, kao i da se uputi zahtjev Gradskom vijeću za sazivanje tematske sjednice na temu rješavanja problema napuštenih životinja, koja će biti održana zajedno sa općinskim vijećima četiri gradske općine.

Općinsko vijeće Stari Grad zaključilo je i da se uputi zahtjev prema resornom ministarstvu u Vladi Kantona Sarajevo, odnosno Kantonalnoj veterinarskoj stanici, da se izjasne da li je moguće ponovo pokrenuti ispostavu Veterinarske stanice u Starom Gradu.



Veliki broj napuštenih životinja na ulicama

Moguće pokretanje ispostave Veterinarske ambulante

Ministarstvo privrede KS trebalo bi da obezbijedi sredstva za opremu koja je neophodna za ponovo pokretanje ispostave Veterinarske stanice (ambulante) u Starom Gradu, a Općina Stari Grad vozilo za potrebe rada.

Zaključeno je ovo na sastanku kojem su prisustvovali Ibrahim Hadžibajrić, načelnik Općine Stari Grad, Emir Hrenovića, ministar privrede KS, Igor Jerković, direktor Veterinarske stanice KS sa saradnicima i Senad Resić iz Službe za privredu

Općine. Sastanak je održan 22. decembra, 2014. godine u Općini.

Na sastanku se razgovaralo o eventualnom ponovnom pokretanju ispostave Veterinarske stanice (ambulante) u Starom Gradu, na području Mjesne zajednice Mošćanica. Dogovoreno je da predstavnici KS, Veterinarske stanice i Općine Stari Grad izađu na teren da bi se utvrdila najbolja lokacija za Ambulantu. Najavljena je mogućnost da se za početak osposobi punkt za rad, dok se završi potrebna procedura i prostor adekvatno opremi, nakon čega bi u potpunosti zaživjela ispostava Veterinarske stanice Stari Grad.

Sastanak je uslijedio nakon što je Služba za privredu, prema Zaključku Općinskog vijeća uputila zahtjev prema resornom ministarstvu u Vladi Kantona Sarajevo, odnosno Kantonalnoj veterinarskoj stanici, da se izjasne da li je moguće ponovo pokrenuti ispostavu Veterinarske stanice u Starom Gradu.



Sa sastanka

Tradicionalna umjetnost u sali Općinskog vijeća



Slika simbolizira moć i snagu

Tradicionalna umjetnost zidnog slikarstva, karakteristična za osmanski period i XV stoljeće, od decembra krasi i zidove sale Općinskog vijeća Stari Grad.

Projekat je rezultat zajedničkog rada turskog Univerziteta Marmar iz Istanbula, Kulturnog centra Yunus Emre i studenata Akademije likovnih umjetnosti, sa Odjela konzervacije i restauracije, a prema riječima predsjedavajućeg Općinskog vijeća Vedrana Dodika, ovo je samo nastavak saradnje sa Kulturnim centrom Yunus Emre.

"Željeli smo da u sali Općinskog vijeća predstavimo zidno slikarstvo jer se ovdje održavaju brojni sastanci: radnih tijela Vijeća, raznih udruženja i drugih, tako da će ovu vrstu umjetnosti vidjeti veliki broj ljudi, a cilj nam je da je zajednički promoviramo", kazao je Dodik.

Na ovoj zidnoj slici radilo je devet profesora sa Univerziteta Marmar, te 24 studenta sa Akademije likovnih umjetnosti predvođeni prof. dr. Ćazimom Hadžimelićem, a kompletan proces slikanja trajao je tri sata, što svjedoči o kompleksnosti ove tehnike.

Rad simbolizira bogatstvo, snagu i zbližavanje i kontinuiranu vezu Bosne i Hercegovine sa osmalijском vlašću. "Zlatna i plava boja na slici predstavljaju moć, snagu, veselost i zbližavanje", pojasnio je prof. Hadžimelić.



Sa predstavljenja slike u sali Općinskog vijeća

Privreda

Dodijeljena sredstva za kupovinu stoke, hrane, izgradnju štala

Treća godina ulaganja u podsticaj poljoprivrede • Cilj projekta razvoj malih gazdinstava

Potpisivanjem ugovora o dodjeli sredstava za podsticaj stočarske proizvodnje, 30 poljoprivrednika iz Starog Grada dobilo je sredstva u iznosu od 28.050 KM kojima će biti stimulisan njihov rad. Podsticaj su dobili građani koji se bave govedarstvom, ovčarstvom, te kozarskom, peradarskom i ribarskom proizvodnjom, a koji su ispunili uslove Javnog poziva za stimulaciju stočarske proizvodnje, raspisanog u septembru, 2014. godine.

Načelnik Hadžibajrić je prilikom potpisivanja ugovora sa korisnicima naglasio da je Općina Stari Grad po svom položaju pogodna za razvoj poljoprivrede.

“Općina Stari Grad zauzima najveću površinu u odnosu na gradske općine i velika prostranstva su na njenim rubnim dijelovima. U tom smislu je desna obala Miljacke izuzetno pogodna za razvoj poljo-



Kamber i Hadžibajrić sa jednim od korisnika

privrede, posebno stočarstva, te to moramo iskoristiti,” kazao je Hadžibajrić.

Projekat stimulisanja stočarske proizvodnje Općina realizuje već tri godine. Prema riječima Alije Kambera pomoćnika načelnika za privredu, cilj projekta je razvoj poljoprivrede, posebno malih gazdinstava.

“Iako je teška situacija, ipak smo ove godine izdvojili 28.050 KM za podsticaj razvoja stočarstva, kako sitne tako i krupne stoke. Korisnici će ova sredstva iskoristiti za nabavku stoke, izgradnju objekata za stoku ili za kupovinu hrane za stoku,” pojasnio je Kamber.

U posljednje tri godine izdvojeno je skoro 300.000 KM

U posljednje tri godine izdvojeno je skoro 300.000 KM za podsticaj razvoja poljoprivredne proizvodnje, a prema najavama načelnika Hadžibajrića i za 2015. godinu su planirana sredstva za podsticaj pčelarstva, mljekarstva, plasteničke proizvodnje i svega što spada u oblast poljoprivrede.

“U 2012. godini smo za podsticaj poljoprivrede izdvojili 83.000 KM, prošle godine 113.000KM, a ove godine 98.000 KM. S obzirom na cjelokupnu situaciju ne vjerujem da ćemo moći povećavati ovaj iznos u narednoj godini, ali ćemo planirati ista sredstva,” kazao je Hadžibajrić.

Jedini se bavi ribarstvom u Općini

Jedini poljoprivrednik u Starom Gradu koji se bavi ribarstvom, Emir Moro, kupit će hranu za ribe.

“Bavim se ribarstvom. Imam tri bazena i tri vrste ribe: potočarku, kalifu i zlaticu. Malo kome je uspjelo uzgojiti ove ribe, ali eto ja sam probao i uspio. Općina mi je pomogla i to mi puno znači. Sredstva ću iskoristiti za hranu i za mrijest jer mi prošli put nije uspio zbog velikih padavina,” ispričao je Moro.



Emir Moro

Kupit će hranu za stoku

Jedna od onih koja će dobiti sredstva iskoristiti za kupovinu hrane za stoku je i Nura Jašarević

“Imam pet krava, troje teladi i 60-ak ovaca, te kokoši. Kupit ću prehranu za njih. Ja imam 65 godina, a muž 67. od ovog živimo i radimo. Neko dođe kući pa prodajem, nešto odnesem...i, tako.” kaže Jašarević.



Nura Jašarević

Adaptirat će štalski prostor

Kao i Jašarevići, i porodica Elvira Omeragića živi od svog rada i ovčarske proizvodnje u Donjem Biosku. “Bavim se proizvodnjom ovaca, nekih 15 godina. To je jako unosan posao za onoga ko hoće da radi. Ove godine smo pretrpjeli štete od poplava i ova pomoć od Općine će nam dobro doći. Ja ću iskoristiti sredstva za adaptaciju štalskog prostora,” kazao je Omeragić



Elvir Omeragić

Protokolarne aktivnosti

Potpisana Deklaracija o donaciji računarske opreme



U ime Općine Deklaraciju potpisala pomoćnica načelnika Amina Deljković

Potpisivanjem Deklaracije o donaciji između predstavnika Ambasade Republike Češke u BiH i četiri gradske općine i Gradske uprave Sarajevo (20. novembra, 2014. godine) završena je prva faza projekta "Potpora odjelima za razvoj u Gradskoj upravi i gradskim općinama".

U sklopu ovog projekta Gradskoj upravi i svim gradskim općinama bit će donirana po četiri računara i dva printera. Vrijednost ove donacije je oko 18.000 eura.

U ime Općine Stari Grad i njenog načelnika Ibrahima Hadžibajrića, Deklaraciju o donaciji je potpisala Amina Deljković, pomoćnica načelnika za obrazovanje, kulturu, sport i lokalni razvoj. Zahvalila se na doniranoj opremi, te kazala šta Općina Stari Grad očekuje od ovog projekta. "Očekujemo da ćemo nadograditi stečeno znanje i da ćemo biti sposobni da samostalno apliciramo na fondove EU i

Projekat će trajati dvije godine

Projekat "Potpora odjelima za razvoj u Gradskoj upravi i gradskim općinama" počeo je u oktobru, 2014. i trajat će dvije godine. Njegovu implementaciju finansira Vlada Republike Češke. U prvoj fazi, projekat je podrazumijevao prenos iskustava i znanja iz Republike Češke uposlenicima Gradske uprave i gradskim općinama. Druga faza odnosila se na donaciju računarske opreme, a u trećoj je planirana realizacija konkretnih projekata od kojih će direktnu korist imati lokalne zajednice.

drugih međunarodnih organizacija", kazala je Deljković.

Osim Općine Stari Grad donaciju su dobile: Gradska uprava, općine Centar, Novo Sarajevo i Novi Grad.

Općina pomaže obnovu Gaze

Općina Stari Grad Sarajevo potpisala je 31. oktobra sa Općinama Novi Grad i Ilidža, te Gradom Sarajevo, Protokol o saradnji na zajedničkoj realizaciji projekta pomoći obnovi Gaze.

Protokol je potpisan u cilju realizacije potrebnih aktivnosti na pripremi i provođenju zajedničke pomoći obnovi Gaze, a na zahtjev Udruženja Palestinske dijasporu u BiH.

Ovo Udruženje ustanovilo je da je trenutno najveća potreba stanovnika Gaze provođenje rasvjete u kuće siromašnih porodica. Projekat će obuhvatiti 400 kuća, a

njegova ukupna vrijednost je oko 38.800 KM. Općina Stari Grad će, u skladu sa svojim budžetskim mogućnostima, za ove svrhe izdvojiti 10.000 KM, koliko će donirati i Općina Ilidža. Općina Novi Grad će izdvojiti 15.000 KM, a Grad Sarajevo 7.000 KM.

Implementator projekta u Gazi bit će organizacija Human-Appeal-Palestine, a rok za njegovu realizaciju je 30 dana. Udruženje Palestinske dijasporu u BiH obavljat će tehničke poslove oko realizacije projekta, te izvijestiti donatore o provođenju projekta i uvođenju rasvjete u kuće pomenutih korisnika.

Sastanak načelnika gradskih općina



Sa sastanka u Općini Novo Sarajevo

Sastanak načelnika gradskih općina održan je početkom decembra u Općini Novo Sarajevo. Sastanku su, pored domaćina načelnika Nedžada Koldže, prisustvovali načelnik Općine Stari Grad Ibrahim Hadžibajrić, načelnik Općine Novi Grad Semir Efendić, te savjetnik načelnika Općine Centar Mustafa Resić.

Razgovaralo se o brojnim temama, a kada je u pitanju provedba Zakona o javnim nabavkama, načelnici su se složili sa tim da se hitno donesu neophodni podzakonski akti, koji bi trebali na adekvatan način regulisati ovu oblast jer, iz dosadašnje prakse, ovakav Zakon nije u potpunosti provodiv.

Načelnici gradskih općina mišljenja su da je Zakon o premjeru i katastru zemljišta više štetan nego provodiv, jer bi, između ostalog, doveo do dodatnog sukoba nadležnosti, zatim do bitnog smanjenja efikasnosti gdje bi, nažalost najviše ispaštali građani.

Vezano za problematiku pasa lualica, načelnici podržavaju mjere koje je poduzela Vlada Kantona Sarajevo po pitanju uklanjanja agresivnih pasa lualica, a i same općine su se uključile u te aktivnosti, kako u saradnji sa JP „LOKOM“, tako i sa ostalim higijenskim servisima. Nakon sastanka, načelnici su obišli i sportsku dvoranu na Grbavici koja je u izgradnji.



Obišli dvoranu na Grbavici

Projekti



Multifunkcionalni trg ispod kojeg će se nalaziti garaža

Četiri razvojna projekta za 2015. godinu

U martu razmatranje zahtjeva za kreditno zaduživanje • Realizacija projekata u interesu građana • Poboljšanje energetske efikasnosti

Saudijski fond za razvoj najavio je da će u martu 2015. godine razmatrati zahtjev za kreditno zaduživanje Općine Stari Grad Sarajevo za sredstva kojima Općina planira finansirati četiri razvojna projekta od općeg interesa za svoje građane.

Načelnik Općine Stari Grad, Ibrahim Hadžibajrić, potvrdio je da je krajem godine održao konsultativne sastanke sa predstavnicima Saudijskog fonda za razvoj, a na osnovu ranije date saglasnosti Vlade FBiH za kreditno zaduživanje, i da je optimista po pitanju odobravanja kredita.

“U martu 2015. godine, Saudijski fond za razvoj razmatrat će zahtjev Općine Stari

Grad za kreditno zaduživanje. Tim sredstvima, ukoliko ih dobijemo, realizovat ćemo četiri projekta koji su, prije svega, u općem interesu naših građana, a onda i šire zajednice.” kazao je Hadžibajrić. Načelnik je pojasnio da se radi o projektima izgradnje parking garaže, sportske dvorane, nadogradnji objekta Doma zdravlja Stari Grad i 'utopljanju' zgrade Općine Stari Grad.

“Mogu reći da su razgovori bili konstruktivni i ja vjerujem da će Općina dobiti ovaj kredit, tako da se nadam da već u aprilu sljedeće godine možemo pokrenuti tenderske procedure, a početak realizacije ovih projekata planiramo za 2015. godinu,” dodao je Hadžibajrić.

Rješava se problem nedostatka parking prostora

Ukoliko sredstva budu odobrena, već u 2015. godini Stari Grad imat će novu javnu garažu, sportsku dvoranu, poboljšanu zdravstvenu uslugu kroz povećanje prostora Doma zdravlja Stari Grad, a i uposlenici same Općine dobit će bolje uslove za rad.

Općina Stari Grad planira ublažiti problem nedostatka parking prostora u gradskoj jezgri izgradnjom javne



parking garaže sa multifunkcionalnim trgov, preko puta Vijećnice, u ulici Avdage Šahinagića. Pored toga što će riješiti problem saobraćaja u mirovanju, realizacijom ovog projekta uvest će se novi sadržaji: zelene površine opremljene savremenim mobilijarom za igru djece, uređene površine za okupljanje i zadržavanje građana, posjetilaca i turista, kao i za održavanje različitih manifestacija itd.

Sportska dvorana uz OŠ "Edhem Mulabdić"

Zahvaljujući kreditnim sredstvima u Starom Gradu prvi put će biti izgrađena savremena sportska dvorana koja će služiti za bavljenje različitim sportskim disciplinama, ali i za održavanje brojnih manifestacija. Sportska dvorana gradit će se na mjestu gdje je sada ograđeni prostor školskog dvorišta OŠ "Edhem Mulabdić", a imat će igralište dimenzija 20 x 38 m sa teleskopskim tribinama, kancelarije i galeriju sa koje je moguće posmatrati sportska takmičenja, prostori sa svlačionicama za sportiste, sudije, nastavnike i drugo.

Novi dućani na Baščaršiji



Halvadžiluk dućani

U narednoj godini bi trebala biti realizovana još tri kapitalna projekta, a najzvučnija je rekonstrukcija ulice Strošići koja će početi na proljeće. U ovoj ulici živi više od 300 stanovnika, u nešto više od 100 domaćinstava. Projekat rekonstrukcije ulice vrlo je zahtjevan zbog velikog broja kuća, a radit će se kompletna izmjena infrastrukture. Projekat je vrijedan oko 600.000 KM. U narednoj godini je najavljena mogućnost i rekonstrukcije Baščaršijskog trga, te realizacija projekta Halvadžiluk, odnosno izgradnja novih dućana na Baščaršiji.



Perspektiva iz ulice Sagrdžije



Školsko dvorište OŠ "Edhem Mulabdić"



Budući izgled sportske dvorane

Projekti



Objekat Doma zdravlja izgrađen 60-tih godina

Nadzidivanje centralnog objekta Doma zdravlja Stari Grad

Nadzidivanjem centralnog objekta Doma zdravlja Stari Grad ublažit će se problem manjka prostora za pružanje

kvalitetne zdravstvene zaštite za građane Općine. Objekat je građen tokom '60-ih godina prošlog stoljeća, a svojim kapacitetom ne zadovoljava potrebe pružanja primarne i konsultativno-specijalističke zdravstvene zaštite stanovnicima Općine. Osim toga, obezbjeđenjem adekvatnog prostora za rad uposlenika Doma zdravlja unaprijedit će se njihov rad i kvalitet usluga u skladu sa potrebama stanovništva.



Sadašnji izgled ulice Strošići

Poboljšanje energetske efikasnosti zgrade Općine Stari Grad

U cilju uštede potrošnje energije potrebne za grijanje, hlađenje i ventilaciju objekta, te smanjenje emisije CO₂ u okolinu, naredne godine pristupit će se i projektu poboljšanja energetske efikasnosti objekta Općine Stari Grad, tzv. "utopljanje". Realizacijom ovog projekta povećat će se toplinska udobnost, a na godišnjem nivou ostvarila bi se ušteda toplotne energije od 72%.



Zgrada Općine bit će utopljena

Podrška osnovnim školama

Osnovna škola "Mula Mustafa Bašeskija"

Nakon što je u osnovnoj školi "Mula Mustafa Bašeskija" usljed pada temperature, te dotrajalosti, u potpunosti prestao sa radom kotao putem kojeg se zagrijava objekat škole, nastava u ovoj školi odvijala se u gotovo nemogućim uslovima. Općina Stari Grad je u cilju omogućavanja redovne nastave i normalnih uslova rada za više od 460 učenika i uposlenika ove škole, sa oko 20.000 KM sufinansirala nabavku i montažu kotla za zagrijavanje. Ostatak sredstava u iznosu od 30.000 KM obezbijedilo je Ministarstvo za obrazovanje, nauku i mlade KS.



OŠ "Mula Mustafa Bašeskija"

uglavnom se formira jedno odjeljenje, po 20-ak učenika. Jedan od razloga za manji broj polaznika ove škole su i loši uslovi u kojima se objekat nalazi, a što je i bio povod načelnikove posjete. Direktor Fočo upoznao je načelnika sa izuzetno lošim stanjem krovne konstrukcije na drugom dijelu objekta škole, te oštećenjima na vanjskoj stolariji. U slučaju obilnijih padavina, uposlenici ove škole strahuju da bi moglo doći do obrušavanja krova, te pokušavaju iznaći sredstva za sanaciju. Prema procjenama, za sanaciju fasade na oba objekta, vanjske stolarije, krova, mreže centralnog grijanja i nabavku

Uvođenje uniformi za djecu

Jedna od ideja koju imaju roditelji je uvođenje uniformi (kecelja) za djecu, no i tu im je potrebna pomoć. "Ukoliko roditelji i uprava škole donesu zajedničku odluku o nošenju školskih uniformi, Općina će finansirati nabavku uniformi svim socijalno ugroženim učenicima," obećao je Hadžibajrić.

namještaja potrebno je osigurati 490.000 KM.

Sanacija sistema grijanja u OŠ "Saburina" koštala bi oko 30.000 KM. Načelnik Hadžibajrić je obećao da će Općina Stari Grad sufinansirati radove sa 15.000 KM, dok su se za ostatak sredstava obratili Ministarstvu obrazovanja, nauke i mladih KS.

Sastanku su prisustvovali i predstavnici Vijeća roditelja koji su informisali načelnika o tome da se roditelji boje za sigurnost svoje djece kada se kreću kroz mali prolaz koji se nalazi u blizini Kapi-kule i pokušavaju naći najbolje rješenje za to. Uputivši ih na nadležno ministarstvo, načelnik im je sugerirao postavljanje rukohvata koji bi djeci olakšali kretanje, a ukoliko od Ministarstva saobraćaja KS dobiju saglasnost za postavljanje, sve radove će finansirati Općina. OŠ "Saburina" trenutno pohađa 295 učenika raspoređenih u 14 odjeljenja.

Osnovna škola "Saburina"

Načelnik Ibrahim Hadžibajrić posjetio je najstariju osnovnu školu u Općini Stari Grad, OŠ "Saburina", koja je sagrađena 1926. godine. U školi su ga dočekali v.d. direktora škole Rešad Fočo, te nastavno osoblje, a prisustvovao je i času jedinog odjeljenja prvog razreda ove škole. Iako je škola nekada imala znatno više učenika prvih razreda (npr. 1991. godine je bilo pet odjeljenja), posljednjih godina se taj broj znatno smanjio i



Neophodna sanacija sistema grijanja



Svake godine sve manji broj prvčića

Projekti



Izgrađeno novo sportsko igralište Iza gaja

Novo sportsko igralište u Starom Gradu otvoreno je krajem septembra, 2014. godine. Općina je na području mjesne zajednice Hrid-Jarčedoli, u ulici Iza gaja (preko puta Paragliding kluba Extreme), izgradila savremeni sportski teren za mali nogomet, dimenzija 20x40 metara. Igralište je otvoreno revijalnom utakmicom selekcija Zavoda "Mjedenica", a oba tima su na poklon od načelnika Općine, Ibrahima Hadžibajrića, dobili korpe sa slatkišima i fudbalsku loptu.

Najavivši da će uskoro na igralištu biti postavljena i dva kontejnera-svlačionice koje će donirati Turski vojni bataljion u BiH, načelnik Hadžibajrić je rekao da je ovo jedno od rijetkih igrališta u Kantonu

Sarajevu urađeno po najsavremenijim standardima.

"Radi se o modernom i savremenom igralištu izgrađenom po evropskim standardima. Kako bi se moglo koristiti i za košarku i rukomet, a ne samo za mali nogomet, podloga je od asfalta. Danas ga otvaramo revijalnom utakmicom koju igraju djeca iz Zavoda Mjedenica, a inače će biti otvoreno za sve građane," kazao je Hadžibajrić.

Revijalnu utakmicu odigrali su učenici Zavoda Mjedenica koji učestvuju na takmičenjima prikladnim za njihove sposobnosti.

"Ovo je od velikog značaja za njih i nadam se da ćemo donijeti sreću ovom terenu i budućim utakmicama", kazao je Adis Lukač, nastavnik u Zavodu Mjedenica.

Iskazana potreba za sportskim terenima

Istraživanje provedeno za potrebe izrade Strategije za mlade Općine Stari Grad 2012-2017. godine, pokazalo je da je jedan od gorućih problema, kada je riječ o sportskim aktivnostima, nedovoljan broj sportskih terena, te nepostojanje sportskog mobilijara na postojećim terenima u Starom Gradu. Kako je općina Stari Grad urbana sredina sa vrlo malom, ili nikakvom mogućnošću gradnje novih objekata, ovaj problem je bilo teško riješiti. Ipak, pronađeno je rješenje na prostoru mjesne zajednice Hrid-Jarčedoli gdje se pristupilo raščišćavanju i krčenju nepristupačne i neiskorištene lokacije i gradnji novog terena.

Izdvojeno oko 150.000 KM

Sportsko igralište u ulici Iza gaja je građeno u dvije faze, 2013/14. godine. Izdvojeno je oko 150.000 KM za gradnju potpornog zida, igrališta, asfaltiranje, postavljanje zaštitne ograde i pristupnog puta.



Zajednička fotografija selekcija



Timovi Zavoda "Mjedenica" revijalnom utakmicom otvorili igralište

Fondacija "Asmir Begović" i Općina Stari Grad grade igralište za Zavod Mjedenica



Betonirana površina i postavljena ograda

Zavod za specijalno obrazovanje i odgoj djece "Mjedenica", nakon više od 60 godina postojanja, konačno će dobiti sportsko igralište koje će koristiti oko 180 djece i korisnika. Zemljište za izgradnju igrališta, potrebne dozvole i izbor izvođača radova obezbijedila je Općina Stari Grad, a izgradnju finansira bh fudbalski reprezentativac Asmir Begović, putem svoje Fondacije.

Projekat izgradnje igrališta trebao je biti realizovan još prošle godine, ali zbog neriješenih imovinsko-pravnih odnosa, projekat se morao izmijeniti, što je iziskivalo dodatne troškove i prolongiranje radova.

U međuvremenu, reprezentativac Asmir Begović, već poznat javnosti po svojoj humanosti i velikom srcu, posjetio je Zavod Mjedenica s namjerom da im pomogne. Prema riječima Selmira Hadžića, koordina-

tora za realizaciju ovog projekta iz Zavoda Mjedenica, Begović je posebno osjetljiv na djecu sa posebnim potrebama i u nekoliko navrata je posjećivao Zavod.

Fondacija "Asmir Begović" je uplatila sredstva u iznosu od 27.100 KM za izgradnju igrališta, koja je počela 20. oktobra.

Radovi su dobro napredovali, ali su vremenski uslovi pomjerali rok za završetak.

Igralište je većim dijelom završeno, površina je betonirana i postavljena je ograda oko tri strane igrališta, u visini od pet metara. Preostalo je asfaltiranje. "S obzirom da je ploha betonirana, da bi postavili asfalt neophodna je temperatura oko 10 stepeni i potpuno isušena podloga. Čim se steknu vremenski uslovi, igralište ćemo asfaltirati, postaviti mobilijar i ugraditi četvrtu stranu ograde, čime će radovi biti

Igralište Mjedenica među prioritetima Fondacije

BH reprezentativac Asmir Begović je posebno osjetljiv na djecu sa posebnim potrebama, a Fondacija "Asmir Begović" osnovana je s ciljem da pomogne izgradnju i poboljšanje rekreacijskih i sportskih objekata u Bosni i Hercegovini i Engleskoj. Nakon donatorske večere, održane u septembru u Engleskoj, kojoj je prisustvovao i kapiten bh reprezentacije Edin Džeko, te Begovićevi saigrači i uprava Stoke Cityja, prikupljeno je oko 50.000 funti, a jedna od prvih aktivnosti Fondacije je izgradnja sportskog igrališta Mjedenica.

završeni", pojasnila je Aida Veladžić, šef Odsjeka za investicije Općine.

Igralište će imati dimenzije 9x16,5 metara, a vrijednost projekta je 24.567,08 KM.

Kako je istakao Selmir Hadžić, sport izuzetno važan u procesu rehabilitacije.

"Ovo će biti veliki motivacijski faktor djeci, naročito onima koji su na smještaju i brizi 24 sata i koji će poslijepodne svoje slobodne aktivnosti moći privoditi na tom terenu," istakao je Hadžić i dodao: "Asmir je dobronamjerman čovjek velikog srca i finansirat će i nabavku opreme za djecu sa kombinovanim poteškoćama, tj. nabavku sprava, pomagala i sportskih rekvizita koji su potrebni ovoj djeci," dodao je Hadžić.

Nova vodovodna i kanalizaciona mreža u ulici Paje

Postavljena je nova vodovodna i kanalizaciona mreža u ulici Paje, u starogradskoj Mjesnoj zajednici Mahmutovac, a radovi su finalizirani asfaltiranjem ulice.

Projektom je 13 domaćinstava dobilo nove vodovodne i kanalizacione priključke. "Ranije su priključci ovih domaćinstava bili vrlo loši, često je dolazilo do začepjenja, te curenja vode iz cijevi. Sada su dobili potpuno nove priključke i prema onome što mi saznajemo na terenu, građani su izuzetno zadovoljni," kazali su u Službi za investicije, komunalne i inspeksijske poslove Općine.

Na kompletnoj trasi je prvo raščišćen



Tokom postavljanja cijevi

teren i prekopane postojeće asfaltne i tamponske površine i putevi. Uklonjene su stare i dotrajale cijevi i postavljene nove, u dužini od 80 metara, a potom su urađeni priključci.

"Dok su izvođeni radovi, građani ovog dijela Starog Grada koristili su vodu sa primarnog voda. Kada su postavljene nove cijevi, urađena je laboratorijska analiza vode, a nakon dobivenih nalaza o ispravnosti vode, pušteni su novi priključci," pojašnjavaju u Službi.

Ukupna vrijednost projekta je oko 66.000 KM, izvođač radova je firma "Mibral" iz Sarajeva.

Izgradnja i sanacija potpornih zidova

Završena je izgradnja i sanacija četiri potporna zida u Općini Stari Grad. Riječ je o zidovima u ulicama: Baruthana kod broja 69 - dva zida, Nadlipe broj 6 i Pastrma preko puta broja 9. Svi projekti koštali su oko 55.400 KM.

Nadlipe



Novi zid dužine 48 metara

Izgrađen je novi potporni zid u ulici Nadlipe broj 6. Projekat je podrazumijevao uklanjanje starog dotrajalog zida, iskopavanje temelja, ugradnju željeza za temelje i betoniranje. Zid je izgrađen u dužini od 48 metara i visini od 1,7 do 2,2 metra. Izgradnju ovog zida sa oko 34.400 KM finansirala je Općina, a izvođač radova je bila firma "Bosman" iz Sarajeva.

Baruthana

U ulici Baruthana kod broja 69 izgrađena su dva potporna zida na mjestu gdje su se ranije nalazili ostaci obrušenih, starih zidova.

Jedan armirano-betonski potporni zid izgrađen je uz saobraćajnicu, a drugi nedaleko od njega uz obližnju kuću. Potporni zid izgrađen uz saobraćajnicu dug je 13 metara, prosječne visine 2,5 metra, a izgradila ga je firma Set Invest. Vrijednost investicije je bila oko 4.400 KM.

Drugi potporni zid izgrađen je u dužini od 14 metara i visini od 3 metra, a izvođač je bila firma Vindi-Tip. Vrijednost investicije bila je oko 5.100 KM. Radove je finansirala Općina.

Pastrma



Zid koštao 11.500 KM

Potporni zid u ulici Pastrma preko puta broja 9 izgrađen je u dužini od 14 metara. Gradnja ovog zida Općinu Stari Grad koštala je oko 11.500 KM, a izvođač radova bila je firma "Bosman" iz Sarajeva.

Projekti

Asfaltiranje starogradskih ulica

Na području Općine Stari Grad u posljednja tri mjeseca asfaltirano je i sanirano sedam ulica. Za ove radove Općina je izdvojila oko 166.000 KM.

Dio ulice Sedrenik

Novi asfalt u dijelu ulice Sedrenik od broja 290 do 306 postavljen je u dužini od 150 i širini 3,5 metra. Za ovaj projekat Općina Stari Grad je obezbijedila 18.000 KM.



Sedrenik

Kračule

Ulica Kračule asfaltirana je u dužini od 140 i širini od četiri do četiri i po metra. Sanacija ove ulice podrazumijevala je uređenje puta, nasipanje tampona, izdizanje šahtova i rešetki, te završno asfaltiranje. Sanaciju ove i još dvije ulice (Dolovi i Baruthana) s oko 74.300 KM finansirala je Općina.



Kračule

Dio ulice Dolovi

Saniran je i asfaltiran makadamski dio ulice Dolovi (od broja 4 do kuće Imamovića). Asfalt je postavljen u dužini od oko 230 metara i prosječnoj širini od oko tri metra.



Dolovi

Baruthana

Asfaltirana je i ulica Baruthana, od broja 26 do broja 28. U sklopu ovog projekta uklonjen je stari i oštećeni asfalt i postavljen novi. Sanirana je ulica u dužini od 242 metra.



Baruthana

Prvi bataljon

Postavljen je novi asfalt u ulici Prvi bataljon u dužini od oko 100 metara i širini od tri i po do pet metara. Projekat asfaltiranja ulice Prvi bataljon sa oko 18.200 KM finansirala je Općina.



Prvi bataljon

Nadlipe čikma

Nadlipe čikma je sanirana i asfaltirana u dužini oko 243 metra i prosječne širine od 3,5 do 4 metra. Vrijednost radova iznosila je oko 40.500 KM.



Nadlipe čikma

Hladivode

Ulica Hladivode od broja 70 do 78, asfaltirana je u dužini oko 160 metara. Ulica je sanirana raščišćavanjem i postavljanjem novog tampona, te izdizanjem slivnih rešetki, vodovodnih šibera i šahtova na potrebnu visinu. Investiciju vrijednu oko 15.000 KM finansirala je Općina.



Hladivode

Postavljeno oko 250 metara rukohvatnih ograda



Rukohvati na Sedreniku u ulici Prvi bataljon

Projekat postavljanja novih rukohvatnih ograda na području Starog Grada za 2014. godinu je okončan, potvrđeno je u Odsjeku za komunalne poslove Općine.

“U sklopu ovog projekta, na jedanaest

lokacija postavljeni su klasični rukohvati od crnih cijevi zaštićenih bojom, dužine 257 metara. S obzirom da se radi o terenima sa većim nagibom, postavljanjem ovih ograda olakšano je kretanje građana, a najviše stari-

Rukohvati na jedanaest lokacija

Novo postavljene rukohvatne ograde postavljene su u ulicama: Čeljigovići kod broja 1 dužine 20 m, Džemala Čelića dužine 12 m, Na varoš dužine 100 metara, Braće Nuhić od broja 16 do broja 19 dužine 32 metra, Paje čikma od broja 4 do broja 10 dužine 20 m, Paje kod broja 69 dužine 5 m, Za beglukom od broja 24 do broja 28 dužine 63 m, Save Skarića kod broja 4 dužine 5 m, Prvi bataljon od broja 2 do broja 6 dužine 34 m, Vinograd od broja 5 do broja 28 dužine 45 m i Boguševac čikma kod broja 6 dužine 21 m.

Pored navedenih lokacija, rukohvati su postavljeni i u ulici Za beglukom kod tunela dužine 9 metara, na mjestu gdje su već postojali, ali su bili otuđeni od strane nepoznatih lica.

jih osoba i djece”, pojasnili su u Odsjeku.

Ukupna vrijednost radova iznosila je oko 29.000 KM, a finansirala ih je Općina Stari Grad. Izvođač radova je bila firma “Fadž Company” iz Sarajeva.

Numerisano 100 ulica za dvije godine

Projekat numerisanje starogradskih ulica, odnosno postavljanja novih tabli s nazivima ulica i kućnim brojevima je ušao u novu fazu. Od decembra 2014. godine, pa i u narednoj godini, numerisat će se 33 ulice u mjesnim zajednicama Mahmutovac, Hrid-Jarčedoli, Toka-Džeka,

Širokača, Bistrik, Babića bašča, Kovači, Medrese, Mjedenica, Moščanica, Sedrenik, Sumbuluša i Vratnik. Planirano je da nove table s nazivima ulica i brojevima postavimobudu postavljene na 1.448 objekata.

I za ovu fazu nove table izradilo je Društvo za zapošljavanje osoba hendikepiranog sluha i govora “Pismolik”, a njihovo štampanje sa oko 25.700 KM finansirala je Općina. U sklopu ovih radova na nekim lokacijama bit će potrebno i postavljanje posebnih “nosača tabli”, a koštaju oko 2.700 KM. Stubove je izradila firma “Librag” iz Sarajeva.

Numeracija u još 33 ulice

Obilježavanje i numeracija planirana je u ulicama: Okrugla, Iza bašče, Bistrik, Iza Hrida, Mujezinova, Pod Hridom, Pastrma, Krka, Za Beglukom, Nadmejdani, Lipe, Franjevačka, Bistrik medesa, Garaplina, Obala Isa-bega Ishakovića, Braće Morić, Džemala Čelića, Avdage Šahinagića, Evlije Čelebije, Mlini, Kasima ef. Dobrače, Safvetbega Bašagića, Alije Nametka, Donje biosko, Moščanica, Brdovita, Kriva, Barice, Bakije sokak, Ploča, Nevjestina, Čebedžije i Gornje čebedžije.

Izdvojeno preko 100.000 KM

Ulice u Starom Gradu posljednji put su numerisane prije 38 godina. S obzirom na veliki broj novoizgrađenih objekata i proširivanje ulica novim krakovima, ukazala se potreba za novom numeracijom. Do sada je numerisano 100 ulica i pro-



Nadmejdani

jekat se realizuje prema planiranoj dinamici.

Projektom za april, 2012/novembar, 2013. godine numerisane su 52, a za novembar, 2013/novembar, 2014. godine 48 ulica, a nove table postavljene su na 5.518 objekata. Postavljena je 5.141 mala tabla s nazivima ulica i 237 velikih tabli. Za obje faze izdvojeno je oko 90.000 KM.

Sport

Selekcija OŠ "Edhem Mulabdić" jesenji prvak BH Telecom lige

BH Telecom fudbalska liga osnovnih škola Starog Grada jedinstven je projekat u Općini • Najvažnije bilo poštovati fair play • Mnogi poznati sportisti bodrili starogradske osnovce



OŠ "Edhem Mulabdić" jesenji prvak

Jesenji prvak BH Telecom fudbalske lige osnovnih škola Starog Grada je selekcija Osnovne škole "Edhem Mulabdić". Nakon trijumfa u posljednjoj utakmici nad selekcijom "Vrhbosna", rezultatom 7:0, osigurali su sebi prvo mjesto u jesenjoj polusezoni prvenstva, koje će biti nastavljeno na proljeće.

Nakon odigranih utakmica deset kola najbolji strijelac je Aldin Pojata sa postignutih 14 golova, dok su Muhamed Šabić i Alden Titorić imali po 10 pogodaka.

BH Telecom fudbalska liga osnovnih škola Starog Grada jedinstven je projekat u našoj Općini, a počela je 01. ok-

Kantonalne lige Sarajevo. Utakmice se igraju u dva poluvremena, po 20 minuta.

Jesenja polusezona BH Telecom fudbalske lige osnovnih škola Starog Grada trajala je do 03. decembra, 2014. godine, a prethodilo joj je predavanje o pravilima igre i fair play-u, te podjela fudbalskih lopti i garnitura dresova svim učesnicima.

Komesari lige, Mehmed Janjoš Čala i Mensud Handžić, iz Službe za obrazovanje, kultur, sport i lokalni razvoj, jednoglasni su da je jesenja liga ispunila glavni cilj, a to je naučiti djecu fair playu. "U prvim utakmicama smo bili vrlo rigorizni i svako 'iskakanje' iz fair playa smo oštro kažnjavali. Kako je vrijeme odmi-

takmičarski duh, a pojedini su se istakli zaista dobrom igrom," kazao je Janjoš.

Proljetna polusezona počće 04. februara, 2015. godine i trajati do 15. aprila. Pokrovitelj fudbalske lige osnovnih škola Starog Grada je kompanija BH Telecom.



Djecu bodrili brojni poznati sportisti

Jesenju sezonu obilježile su i brojne posjete uglednih fudbalskih stručnjaka, bivših igrača i trenera iz našeg grada koji su željeli pratiti ove utakmice i bodriti mlade talente. Između ostalih, utakmice su pratili Faruk Hadžibegić, Husref Musemić, Nijaz Ferhatović, Nedim Hiroš, Memnun Suljagić, te odbojkaš Ekrem Lagumdžija. Organizatori se posebno zahvaljuju Mufidu Zemiću koji je učesnicima poklonio knjig eo sportu, Nazifu Pašiću koji je igrače snabdijevao sendvičima i sokovima, te Elmiru Behluloviću i Muameru Dalpagiću koji su poklonili fudbalske lopte.



U februaru proljetna polusezona



Komesari lige: Janjoš i Handžić

Poredak na tabeli

Na tabeli je ubjedljivo prva selekcija osnovne škole "Edhem Mulabdić" sa osvojenih 25 bodova, a iza nje je selekcija škole "Mula Mustafa Bašeskija" koja ima 20 bodova. Slijede škole: "Šejh Muhamed ef. Hadžijamaković" (18), "Vrhbosna" (14), "Hamdija Kreševljaković" (7) i "Saburina" (3). Sve utakmice odigrane su na terenu Centra za mali nogomet "Bentbaša".

tobra, utakmicom selekcija osnovnih škola "Vrhbosna" i "Šejh Muhamed ef. Hadžijamaković". Inače, u Ligi učestvuju selekcije šest osnovnih škola iz Starog Grada.

Liga se igra prema UEFA propozicijama kojim se regulišu takmičenja u malom fudbalu. Jedino odstupanje je da ekipa broji šest igrača (golman+pet igrača), radi prilagođavanja pravila dobnoj strukturi igrača. Ligom rukovode dva komesara Lige, a utakmice sude zvanične sudije

calo, iz utakmice u utakmicu, bilo je sve manje potrebe za tim jer su igrači polako shvatali šta je najvažnije i kako se trebaju ponašati," kazao je Handžić. Janjoš se slaže sa njegovim mišljenjem i dodaje da su pojedinci često dolazili da se izvine zbog lošeg ponašanja, te su posljednje utakmice jesenje lige prošle bez ikakvih incidenata. "Naš najvažniji cilj je ispunjen, a to je edukacija igrača, ali i nastavnika i trenera o pravilima fair playa. Pored toga, djeca su se dobro zabavila i razvila

U Aleji ambasadora dosad zasadaeno 136 lipa

Pet novih sadnica zasadena je proteklih mjeseci u Aleji ambasadora, tako da ovo starogradsko izletiste trenutno ima 136 lipa. Svoje lipa u predhodna tri mjeseca zasadili su ambasador Republike Turske Cihad Erginay (26. septembra), ambasadori Islamske Republike Pakistan Muhammad Yousaf i Republike Srbije Stanimir Vukićević

događaj dobrobit, ne samo za građane BiH već i širu zajednicu.

"Ovom sadnjom ja postajem građanin Sarajeva. Aleja ambasadora je vrlo dobar i koristan projekat. Ovo ostavlja trag, ne samo na moj boravak ovdje već i na moje druženje sa ljudima u BiH", kazao je Vukićević

"Postoji izreka da čovjek u životu treba da zasađi jedno drvo, sagradi kuću



Hadžibajrić i Cihad



Vukićević i Hadžibajrić



Hadžibajrić i Yousaf



Pammer, Hadžibajrić i Hellbach

(16. oktobra), te ambasadori Savezne Republike Njemačke Christian Hellbach i Republike Austrije Martin Pammer (26. novembra).

Svi ambasadori zahvalili su se predstavnicima Općine Stari Grad, što su im omogućili da budu dio ovog projekta.

"Zaista sam počašćen i veoma sretan ambasador zbog toga što mi se ukazala prilika da posadim lipu. Ovo jako lijepa tradicija i čestitam svima koji su uspjeli da projekat održe ovako dugo, kazao je Erginay.

"Lipa simbolizuje sponu prijateljstva između dvije zemlje. Nadam se da će, dok ovo drvo raste, jednako brzo ili čak i brže rasti dobri odnosi između nas", kazao je Yousaf, te dodao kako je ovaj

i dobije dijete. Dijete imam, kuću još nisam sagradio, ali sam evo zasadio drvo u Sarajevu. Za mene je ovo važna stvar i vrlo mi je drago što sam to učinio baš u Sarajevu," kazao je Hellbach.

"Mislim da je stari slavenski običaj sadnja lipa, a sadnja drveta je znak prijateljstva, a vjerujem da znate da između Austrije i BiH vlada veoma dobro prijateljstvo," kazao je ambasador Pammer.

Ibrahim Hadžibajrić, načelnik Općine Stari Grad, podsjetio je kako svaka nova lipa simbolizuje novo prijateljstvo, te je ambasadorima uručio certifikat, kao potvrdu da su posadili svoje drvo, ali i pozivnicu za ponovni dolazak u BiH i Sarajevo i skicu Aleje ambasadora sa svim dosad zasadenim lipama.

Javna rasvjeta na još 18 lokacija



Projekat koštao 31.800 KM

U okviru projekta izgradnje, sanacije i održavanja javne rasvjete na području općine Stari Grad za 2014. godinu, postavljena je rasvjeta na 18 lokacija. Projekat je s 31.800 KM finansirala Općina Stari Grad, a izvođač radova je bila firma "Testingelektro".

Rasvjeta je postavljena u u ulicama: Jarčedoli 92, Trčivode - nova ulica, Hladivode 7, Faletići bb, Brajkovac prema Hambinoj carini, Kamenica preko puta br. 7, Kamenica od 47 do 53, Ispod Budakovića 14, Potok 24, 10. brdske brigade 102, Ugao ulica Bistrik i Okrugla, Mjedenica 26, Vinograd 3, Hadžikajmakova 33, Hadžikajmakova 38, Hadžišabanova između brojeva 15 i 17, Sunulah ef. kod džamije i Toromanova kod škole.

Sanirana LED rasvjeta u Saračima



Popravljen rasvjeta u Saračima

Na Bašćaršiji, u ulici Sarači, izvršena je zamjena neispravne LED rasvjete. Prema riječima Edina Uzeirbegovića, direktora firme „ARCADE“ iz Tuzle, koja je izvodila radove, saniran je kvar i zamijenjeno 235 trafoa. Rdove na sanaciji LED rasvjete na Bašćaršiji finansirali su u jednakim omjerima Općina Stari Grad i Ministarstvo za prostorno uređenje i zaštitu okoliša Kantona Sarajevo. Vrijednost investicije je bila oko 17.900 KM.

Predstavljamo uspješne male privrednike iz Starog Grada

Palavre dobili motokultivator

Već deset godina uspješno se bave poljoprivredom • Motokultivator donacija organizacije Arbeiter-Samariter-Bund Deutschland



Supružnici Nasuf i Ramiza Palavra sa Zmajevca već desetak godina uspješno se bave poljoprivrednom proizvodnjom. Iako je Nusuf 1996. godine krenuvši u sječu drva stao na minu i ostao bez noge, a 2004. godine ostao i bez posla, kaže da nije puno razmišljao i da je sa suprugom odmah počeo proizvodnju povrća i voća i prodaju na pijaci Markale.

“Veliki trud i rad smo uložili i radimo

to i dalje, ali se i višestruko isplati. Osim plodova za vlastite potrebe, uspijevamo proizvesti dovoljno i za prodaju, od toga živimo posljednjih deset godina”, kaže Nasuf.

Ramiza nam je ispričala da proizvode gotovo sve vrste povrća: krompir, buraniju, luk, mrkvu, kupus..., a da uporedo imaju i voće od kojih prave džemove i sokove. “Raditi moramo i nama ništa nije teško. Sakupljamo borovnice, ber-

emo trave... Jeste teško jer smo već u godinama i slabijeg smo zdravlja, ali se borimo i ne žalimo što smo se počeli baviti poljoprivredom. Zadovoljna sam”, ističe Ramiza.

Porodica Palavra je najbolji primjer kako se od poljoprivrede zaista može živjeti. Poručili su svima koji nemaju posao da se okrenu poljoprivredi i da “rade”, te da će im se to sigurno u budućnosti isplatiti.

Motokultivaor će im dobro doći za lakšu obradu zemlje

U okviru projekta "Socio-ekonomskog osnaživanja žrtava mina" Nasuf je dobio motokultivator.

Donaciju je obezbijedila organizacija Arbeiter-Samariter-Bund Deutschland (ASB), koja provodi projekat "Socio-ekonomsko osnaživanje žrtava mina i njihovih porodica kroz poslovnu obuku i stvaranje mogućnosti za zapošljavanje", a Općina Stari Grad je finansijski učestvovala sa 20 odsto.

“Jako smo zahvalni svima koji su nam pomogli i donirali ovaj motokultivator. Ovo će nam dobro doći, jer smo do sada plaćali za obradu zemlje ili radili ručno”, kazali su supružnici Palavra.

Ovaj projekat značajan je za ekonomsko osnaživanje žrtava mina i njihovu inkluziju u društvu, a korisnik donacije pokazao je da uprkos invalidnosti, svojim vlastitim radom osigurava egzistenciju svoje porodice.



Motokultivator će im dobro doći za obradu zemlje

Stavo Sarajevo

Piše: **MUFID GARIBIJA**, sarajevski arhitekta

Sarajevska porodica Despić

Jedna od najuglednijih srpskih pravoslavnih porodica XIX stoljeća u Sarajevu bila je porodica Despić. Rodonačelnik porodice Despić je Risto Stijepčević, rodnom iz Hercegovine, a njegovi preci su iz Crne Gore. Stijepčević se po-

stvo koje su pretežno ulagali u kupovinu nekretnina. Osim ekonomsko-poslovnog ugleda, kojeg su Despići vrlo brzo stekli, valja spomenuti i njihove rodbinske veze sa također istaknutim sarajevskim trgovačkim porodicama,

sferi. U tom smislu, valja istaći da su Despići davali jedan novi (zapadno-evropski) tonus gradu Sarajevu – spomenimo samo to da su prve pozorišne predstave održavane upravo u njihovoj kući! Također, i na polju društveno-političke aktivnosti Despići su bili zapaženi i izuzetno aktivni – u doba austrougarske okupacije BiH Despići su bili protiv iste! Uz sve kazano valja naglasiti da je ova ugledna sarajevska, ali i bosanskohercegovačka porodica snažno, svojim novčanim priložima i akcijama pomogla izgradnju, odnosno dovršenje Saborne crkve u Sarajevu!

Nakon Drugog svjetskog rata imovina porodice Despić biva nacionalizirana i od tog perioda možemo kazati da započinje polagano nestajanje Despića u aktivnom društvenom životu grada Sarajeva. Posljedni potomci porodice Despić odselili su iz grada 1967. godine, a svoju kuću poklonili su Gradu u želji da njihova kuća bude muzej – Despića kuća, depandans Muzeja Sarajeva. Osim ove kuće Despići su poklonili i kuću u kojoj je danas smješten Muzej književnosti i pozorišne umjetnosti BiH.



lovinom XVIII stoljeća doselio u Sarajevo gdje je završio ćurčijski (krznarski) zanat, a nakon toga oženio se sarajkom Despom, kćerkom nepoznatog handžije. Risto je sa Despom dobio dva sina (Maksima i Nikolu) koje su Sarajlije nazivali Despini sinovi. Tako su, vremenom, Ristini i Despini sinovi, po svom nadimku, dobili novo prezime – Despić!

Prvi spomen Despića u dokumentima je 1780. kada je Nikola Ristić, odnosno Despić, kupio kuću na Latinluku, a magazu i dućan u Tašlihanu u kojima je prodavao ćurčijske proizvode. Ovaj dućan bio je nukles odakle su se razvili obimni poslovno-trgovački poduhvati porodice Despić. Poslovne partnere u svom trgovačkom poslu Despići su brzo našli van Bosne, tačnije u: Carigradu, jugoistočnoj Evropi, Italiji, Austriji i Njemačkoj. Razvojem trgovine, posebno ćurčijskom robom Despići su stekli veliko ekonomsko bogat-

a to su: Jeftanovići, Josipovići, Davidovići i dr. Uz trgovačko-ekonomsku djelatnost, aktivni su bili i u kulturno-umjetničkoj



Četvrti Coca-Cola Sarajevo Holiday Market

Na Trgu oslobođenja - Alija Izetbegović 10. decembra, 2014. godine svečano je otvoren četvrti Coca Cola Sarajevo Holiday Market. Paljenje svjećica na jelki visokoj više od 20 metara, označilo je početak manifestacije koja će trajati do 14. januara, 2015. godine.

